



望溪先生文

偶抄

哀辭

徐詒孫哀辭

受業王兆符程

金輯



康熙辛未余始至京師卽與詒孫善嘗怪其才足以立事而於仕進泊如也學足以立言而於論述頽如也間與同舍夢中數悲嘯或擗臂而呼余驚起問故則垂涕而不言叩其鄉人乃知其父惑於所嬖母得心疾每欲以義理廣之語相近輒以他說格余癸酉自京師歸其家余始寓書告以君

子之遭變也在審其身之所處鯨之殛也禹未嘗
身殉於羽淵而匡章之行不見絕於孟子况未至
此極者乎使徒若焦若熬以喪其精爽而於身之
所處或未盡焉非君子之所尚也戊寅冬十有一
月余客澄江舍側有方池夜夢詒孫赫然起自池
中面泥淖瞪目無言覺而心惡之次年秋七月歸
金陵得詒孫凶問果以余見夢時死詒孫之歸也
母癲益甚父閉之加束縛焉詒孫日夜號泣而從
數歲亦得心疾昏昏不辨人事一夕自投門外小

溪中始詒孫去京師余送之岐路間旣與儕輩登
車復返下車執余手而號慟曰惟子知我何當歸
吾與子得更相見足矣其後詒孫一至金陵余適
在外竟不得再見余一子新殤意殊不自得及聞
詒孫死出門西鄉號而哭之不復覺子死之痛矣
詒孫姓徐氏諱念祖池州青陽人年四十有四內
行潔修文章冠郡邑聞其死者知與不知皆爲流
涕其辭曰

生常自懟兮吾知子艱死非其所兮人終汝憐仁

孝之鬱兮爲惑爲癡孰使至此兮彼蒼者天

劉北固哀辭

康熙四十七年秋七月吾友北固歸自廣東余與其弟古塘溯江候於桐過期不至而得凶問嗚呼昔吾先人與劉氏世好以行輩北固尊於余而與余爲兄弟交北固生於桐余生六合繼而遷江寧未相面也而所學之趣同稍長朋試於有司名必相次也及遊四方與士大夫往還善於北固者多余昵好而嫉余者間波及於北固與北固居或此唱而彼和或辨論相持襍以誚讓而胸中所懷無

毫髮間隔未嘗覺其爲兩人北固終世爲羈於京
師而余往來流滯者亦十年每愁思無聊或中有
所得輒思見北固計旬日中必再三宿其寓齋余
疲疴困憊恒先就寢而使北固誦詩歌古文卧而
聽之靜夜聲朗然率以爲常他時客異地歸休於
家獨居私處未嘗不念此樂也北固體素強邇年
頓衰余旣東歸再書責之恐其負夙志而羈死於
遠方北固感焉其遊廣東蓋將次第爲歸計而謀
所以終老者乃不幸竟道卒其喪之還子選适與

古塘往迎余以故未得偕欲哭於其殯之次亦未
得也因爲文以攄余悲俾其子薦告以妥靈焉其
辭曰

謂子之歸兮終吾生以後先痛一言之未接兮遂
閉影於重泉宦與學其交悔兮命奄忽而不延吾
語子非不早兮胡因循而致然

宣左人哀辭

左人與余生同郡長而客遊同方往還離合踰二十年而爲汎交已丑庚寅間余頻至淮上左人授徒邗江道邗數與語始異之其家在龍山吾邑山水竒勝處也每語余居此之樂而自恨近六十猶栖栖於四方余久寓金陵亦倦遊思還故里遂以辛卯正月至其家左山右湖阜壤如沐留連信宿相期匝歲定居於此而是冬十月以南山集牽連被逮時左人適在金陵急余難與二三骨肉兄弟

望溪集 五
之友相後先在諸君子不爲異而余固未敢以望於左人也壬辰夏余繫刑部左人忽入視問何以來則他無所爲將歸謂余曰吾附人舟車不自由以天之道子無恙尋當歸吾終待子龍山之陽矣及余邀寬法出獄隸漢軍欲附書報左人而鄉人來言左人死矣時康熙五十二年也龍山地偏而俗淳居者多壽耆左人父及伯叔父皆八九十左人貌魁然其神凝然人皆曰當得大年雖左人亦自謂然而竟止於此余與左人相識幾三十年而

不相知相知踰年而余及於難又踰年而左人死雖欲與之異地相望而久困窮亦不可得此恨有終極耶辭曰嗟子精爽之炯然兮今已陰爲野土閉兩心之所期兮永相望於終古川原信美而可樂兮生如避而死歸解人世之糾纏兮得甘寢其何悲

武季子哀辭

康熙丙申夏聞武君商平之喪哭而爲墓表將以歸其孤冬十月孤洙至京師曰家散矣父母大父母諸兄七喪蔑以葬爲是以來叩所學則經書能背誦矣授徒某家冬春間數至假唐宋諸家古文自繕寫首夏余出塞返役而洙死已浹日矣始商平有子三人余皆見其孩提以及成人長子洛爲邑諸生卒年二十有四次子某年二十有一將受室而卒洙其季也憶洙五六歲時余過商平常偕

羣兒喧聒左右少長抱書從其父往來余家及至京師則幹軀偉然余方欲迪之學行以嗣其宗而遽以羈死有子始二歲商平生故家而窶艱迫阨視細民有甚焉又父母皆篤老煩急家事凌襍米鹽無幾微輒生瑕釁然卒能約身隱情以盡其恩而不愆於義余每歎其行之難也而旣羸其躬復札其後嗣嗚呼世將絕而後乃繁昌者於古有之矣其果能然也耶洙卒於丁酉十月十日年二十有一藁葬京師郭東江寧義塚余志歸其喪事有

待先以鳴余哀其辭曰

嗟爾生兮震愆罹百憂兮連延蹇孤遊兮局窄命支離兮爲鬼客天屬盡兮熒熒羗地下兮相從江之干兮淮之汭翳先靈兮日延企魂朝發兮暮可投異生還兮路阻修孺子號兮在室永護呵兮無失

阮以南哀辭

始余兄弟應童子試卽聞阮君以南名於閭巷間
及入庠序與君後先時相見稠人中而未狎也其
後余遊燕齊倦而歸則先君子故交零落幾盡而
新知中惟阮先生汝咸經過最密叩之則君之父
也君所居近市曲巷小橋逶迤而入四面環陂塘
老屋數間蔽翳於叢篁高柳中入其門如在山林
之隩方盛暑風謾謾穿戶牖坐有頃必加衣自仲
夏入秋日未旦先君子卽披衣就阮先生夜定然

望溪集 九
後歸率以爲常君率妻子力作殺雞屠狗具肴蔬
未嘗之絕阮先生旣歿君於門側市藥而授生徒
於堂上先君子旬月猶三數過君余兄弟隨行每
至君必散生徒輟其所事置酒酣嬉終日而罷由
前之爲君以樂其親也由後之爲則以便余兄弟
之情而不肯逆也嗚呼君可謂順於親而篤於友
者矣君旣免喪時謂余子知交在四方朋儕多資
子以餬其口而獨遺余何也時余私計先君子栖
遲寡懽惟君居近而意愜故獨難之以滯君之行

及先君子歿而余及於難又踰年而君死追念平
生遊好傾心向余而余無纖毫之報者莫如君乃
哭而爲文以志余哀君諱夢鰲江寧人卒於康熙
某年年五十有一余聞其喪次年之某月日也其
辭曰
忠○養○不○匱○心○之○競○也○蹇○以○無○年○亦○其○命○也○重○施○而○
茂○以○稱○獨○余○之○病○也○

李伯子哀辭

李習仁字長人吾友恕谷長子也戊戌春余命子道章就學於恕谷歸言習仁耕且學孝友信於其家今年春恕谷歸自江南率習仁過余俾受業其承親事師交友跬步皆在於禮而行之甚安白門翁止園見而嘆曰子弟中未見如斯人者也恕谷少游浙東西樂江介土風南中士人亦聞其風而慕之故率習仁往相宅其乘車習仁御騎則執鞭以從恕谷與諸公論學左右其間南士皆傾心焉

望溪集 七
恕谷以母老未能定遷會其友內人南行使習仁
與妻附舟先之至天津疾作將暫反比登車曰吾
父志此久矣疾當愈何反爲還舟又數日疾革其
妻出視命之曰勿泣此外艙汝不可久留夜將半
氣絕惟小童在側時康熙辛丑八月望前一日也
昔明道程子誌其子邵公謂賦生之類雜糅者多
而精一者間或值焉則其數或不能長夫自古聖
賢之生鮮不爲帝王公侯卿相澤流世嗣者而程
子之言若是豈如衆人之激於所遇耶蓋深觀造

化之消息而有以窮其變也余杪秋自塞上歸聞
吾友劉古塘長子將冠而殤南中子弟無與比並
者慘慟未平而習仁之訃繼至嗚呼以恕谷古塘
之躬行日暮途窮而天奪其良子以二子之資材
間值而不能延其一日之生此余所以易哀爲憂
而終之以懼也習仁自成童有巨人之志旣冠立
課程自檢晝所爲夕必籍之卒年二十有四妻宋
氏始有身其辭曰

嗟爾幼志離羣匹兮善承親心嗣道術兮晝耕夜

誦六藝畢兮性栗而溫儀有壹兮熒熒南行志決
壯兮知命不惑死無恨兮任道有徵識祈嚮兮斯
人則亡予復何望兮

張彝歎哀辭

吾友張彝歎名自超高淳縣人康熙五十七年

天子命公卿舉積學篤行之士司空徐公以自超
對

詔下江南守土吏齎送赴闕余私獨喜計日以待
其至南中故人爭趨之曰子抑心自強此行也尚
其慰方子之思俄而傳遽至則道卒矣始自超以
母老高祖以下惟一身而久無子不敢仕進癸未
成進士長洲韓公將以館職薦踵門辭需次當得

縣令不就嘗遊金陵關中白玫玉適至介余請見而彝歎難之卽日駕而行曰吾鄉人也而世有相慕用者吾無死所矣及余邁難徐公出撫浙而彝歎往爲義學師余心詫焉而未暇詰其所以然其被徵也天下士皆以多徐公及道卒又以咎公而意其言之出於余金陵翁止園聞而嘆曰噫咄哉使彝歎爲浙行者我也彝歎踰六十無子而前卒之三月妾楊氏有身衆皆曰是必生男彝歎之生也余旣譜其行與崑繩言潔古塘爲四君子傳茲故不具而獨最其死生離合之迹以志余哀其辭曰

名之不可耀兮。惟子杜其幾。義之各有時兮。惟子識其宜。惟大專之槃物兮。數少全而多竒。守邱園以竟世兮。而卒死於爲羈。曰德人其必祀兮。亦豈余之所敢知。

王瑤峯哀辭

君諱宗華字瑤峯歙縣人學儒試輒擯通醫方恥以自名年四十餘以親老無養授徒京師康熙癸巳余出刑部獄供事內廷吾母衰疾而京師無良醫當塗吳穎長曰吾友王君通醫匿而不試吾今與子過之旣相見再拜致辭許諾君館內城去余居十里余繼遷海淀愈遼遠君市馬與主人要曰吾友母老疾旬日中必再三往視若難之當辭去主人重君曲聽焉每過余或驟雨及之淋漓徧體

其隆冬晨至冰霜結鬚眉面色異常余對之慘動心忡忡君言笑晏然恐余不自克也每歲孟夏余役塞上迺冬始歸倚君如兄弟吾母疾作聞君至卽自寬及將終衆醫皆曰可療君獨曰疾不可爲也去年冬君持所爲文及詩十數篇示余曰視世士何如余讀竟太息謂曰如君之方苟試之必大行有餘資歸而市田宅事親從兄以竟所學當與古之人絜高下子何恥於爲醫君感焉將散生徒僦屋市藥事未就而死先卒之旬日余夜歸家人

曰王先生來自言胸中如有物遲子不出暮而歸余家僅一僕方卧病將俟其間使問君而黃君際飛以書來言君死矣叩之君疾作卽歸自余家之夕也嗚呼君視吾母之疾猶母而君疾余不視君死余不知聞君之喪竟不得一昔之期撫君之棺而哭也余之恨於君者有終極耶君鄉人袁某與際飛紀其喪權厝某邱而報君之兄弟使來迎際飛亦因穎長而得交於君者君卒於丁酉三月望後二日年五十有二無子妻某氏早卒親老而余

不能爲之謀雖恨於君莫可如何其辭曰
子之旅兮吾與子依子之歸兮吾爲子期養則不
遂兮死而爲羈絕天隔地兮此志長賫懷文服義
兮蔽遏而不施混俗自閉兮行與心違靈魂營營
兮何去而之意氣焄蒿兮結我涕洟乾坤莽蕩兮
惟余汝思千秋萬歲兮人當汝知

和風翔哀辭

乾隆元年六月

天子命修三禮以閣部之長董其成而余亦濫廁
焉各舉所知余言十有二人於鄂張二相國翰林
四人而外固請而得之者惟和生生單門也家世
農田生六七歲父母求之不在側迹之常凝立村
塾外曰吾甚慕諸童子誦書者以爲誑試于塾師
則論孟已耳熟矣少長或聚徒古寺中因請爲諸
生洒掃衆食飲之以受書法公淵若余故人也雍

正二年余得假歸葬公督學按部至江寧叩吾廬
謀分校者遂就見吾友古塘而請焉試事畢古塘
謂余吾得和風翔此役不虛矣越日來見因勸生
棄時文篤志於諸經而屬雲臺山人翁止園以淬
礪之會山西梁君裕厚欲重訂朱子儀禮經傳通
解挾其書至江南與止園討論借力于生者蓋半
焉生幼學書不能躬耕而志在通經業科舉者無
所取之親老家窘空居常戚戚及部檄至聞之色
喜卷書裝歸告其親曰兒茲行館餐於方氏歲秩

百金半給家用半市近宅之田三年歸可不耕而
食終吾生於聖籍矣越日而疾作逮余聞之已踰
月矣急致參苓道希將命至其家生披衣而起曰
吾固知公之不能忘吾疾也吾學當成二親免寒
饑疾當愈止園繼以醫至和齊煮之未熟而生死
余與生惟南歸時一相見未嘗從余遊也余年已
逝病日滋諸經未竟之緒將以屬焉而今已矣生
諱風翔字宇清上元縣人世居蔣山之陽卒年三
十有四妻某氏無子辭曰

嗟爾童年趨獨異兮勞辱苦辛惟學之嗜兮業將就而聞彰儵賁志兮衆萬叢生惟天所真兮窮泉有知母悔母憤兮假而隸農二親亦中棄兮

望溪先生文

偶抄

祭文

祭顧書宣先生文

受業王兆符程峯輯

嗚呼大雅蕪塞不絕如線公復云亡來者何見古惟哲人以道相持降而文學猶其流支陸相登韓道光於唐程張蘇曾顯以歐陽假無二公二代曷述羣賢繼武茲塗無闕余試禮部實出公門公嘉余文或有違言公謂斯文惟某能然所舉不遂甘棄一官旣發其覆果匪異人滿堂動容僕隸同喧

與公朋齒宿號知音得以至公兩無愧心老親趣
余歸裝在途公使來追斬鞅道隅余不反顧懼公
見督公以書來詞温意渥公尋使楚命余速西余
時腹悲冬以為期忽承凶問帶經長號紼轡惟荒
尋駐江臯余入太學公實朋試公既日顯余每自
避辱公交余惟恐不親鈍直可貴公知獨真十年
三接違離日遠誼重心勤結懽則淺公之詩篇已
足自壽在公無悲獨為世疾古稱善人天地之紀
余所師友蓋可屈指大理質行宛平高秩宗經術公裔

長淵韓

侃侃少宰

太原姜

守官不屈窮在下者劉

徐二生

言潔

經明行修吾道之楨後先一紀壯脆

老終匪余恩私懼世瞽聾楚山崩崩邗水嗚咽涕
泣陳詞肝腸斷絕

祭張文端公文

嗚呼我公爲國宗臣終始一節

帝用忱恂公如元氣。運物無迹。審機正軸。功無與匹。其志其事異世。可知寸心耿耿。獨承恩私。余幼泥古孤行。自尚病俗。流從誤矯。以亢伊余。先世與公有連衆附。恐後余避不前。北試京兆。牒過禮部。公比羣士。謂宜獨步。凡在列者。湊公稱師。余獨自外接。以常儀。謂公余棄公心。以傾始脫。文貌喻以平生。歲在協洽。蒼龍南御。公來長干。獲侍旅寓。謂

國得賢如室有木子果能駕吾推子轂余謂公已。
小人有母衰疾相依獨身無輔公鑒其誠悄然不
怡謂子固爾我心則違感公拳拳中如有物余豈
能賢公知恐辱余籍春官由顧與陳陳成進士實
出公門余旣南還謁公里第北面升堂始正大義
公在林泉疊疊翼翼至忠體國心懷

宸極私爲世喜公志未衰孰期踰歲遂乘東維公
自禁密經體贊元明農待老人無間言於人無愧
在天曲全先儒所稱公實應焉在公何悲邦國之
癯况於知故能無心劇嗚呼哀哉

祭王崑繩文

嗚呼子生於天。余謂非偶。嗟同衆萬。視猶芻狗。子
之、心、胸、函、山、振、海、子、之、議、論、風、驚、雷、駭、豈、惟、在、今、
志、亦、無、古、英、光、浩、氣、今、歸、何、所、世、士、虛、憍、外、張、中、
餒、古、所、云、狂、子、差、可、擬、少、隨、父、兄、陸、沉、自、喜、匿、跡、
淮、墳、行、歌、燕、市、志、以、貧、移、傾、身、菽、水、外、取、所、求、中、
以、自、鄙、顧、視、儕、輩、如、塵、如、稊、可、者、數、士、謬、及、於、余、
未、見、而、親、久、益、不、疑、行、身、務、學、以、謀、以、咨、天、與、屯、
蹇、異、徑、同、歸、夙、心、並、負、次、且、路、岐、丙、戌、之、春、揖、我、

長辭二親邱首惟吾所之窮山絕壑形駐影隨雖
子知我跡亦難窺解手三歲別語依依念子孤直
諒不余欺乾坤浪莽會面何時忽叩吾廬驚喜相
顧曰余迴車將農將圃聞子之鄉巖深川互我行
我遊子先我路我耕我耘子偕我作我文我史子
訂我誤高酣連旬忘晨與暮越歲爲期並從所務
始春過余杪秋復至申固前期志氣益厲孰期分
背遂歸虛無委衾旅舍妻子莫扶欵欵友生視衿
與襦傲然乘化其色于于子少自則管葛與衡晚
徒嗚呼哀哉尚饗

希顏孟其志亦誠行與心違蹉跎竟老遺書在篋
其半惟草臨風灑泣氣盡心孤子止於此况於吾
徒嗚呼哀哉尚饗

祭滄洲陳公文

嘻乎陳公履道方夷命忽隕墜斯人之悲公材天
植遭遇亦竒屢困而亨終鬱不施始令西安繼調
山陽端緒已兆所部稱良及再作守皆由特舉義
聲先路戶歌衢舞旬時風動期月政成嘉師怙恃
姦豪易行公治一方譽流千里游談奮袂心矜色
喜再忤大府必擠之死

先皇鑒照獄詞無浼公之在理士民洵洵輟耕廢
業號泣而從或奉壺殮或持服脯謂公良食公無

望溪集
我苦罷歸

內殿稽編文史四海望公如痿思起觀察霸昌
聖心復倚

天語親承古賢是擬河決武陟害延近畿千村流
漂漕轉不時

皇帝曰咨汝予肱股往巡往宣遂攝大府公入大
府百政皆清蠹祛工實賦役有憑三舉監司罔非
民譽父老泣言自今保聚惟
嗣天子大孝親賢乃實授節以肅政權歲漕旣舉

躬臨決河相基命植程工別科告功有期民勞其
惻孰謂公身先與世棄公之屢試久者踰年晚而
大任俾公獨肩謂宜永年以弘開濟而功未成歿
猶賚志邦國之瘁黎蒸之窮其在于公高朗令終
衆心難饜直節易虧惟公炯炯終始無疵完公令
名闕世實用彼蒼有知能無悔慟有心有耳莫不
惻傷况於知舊慙裂中腸嗚呼哀哉尚饗

祭左未生文

余於故里兄事者三朱劉賚志今君亦燿始聞君
行矯亢異俗及余得交但見可欲臭味之同如流
斯滙憂思苦病見君卽解余出余歸行踪每合惟
朱與劉未若君習余之在難君未及唁誓言拳拳
生必再見果踐前期崎嶇自致黃髮素髭其容則
睟余出塞門君亦繼至積色灘聲朝昏相慰始秋
南轅迢迢燕市經涉冬春余行復啓謂君趣駕秋
以爲期孰知背面遂至於斯君訃之至君喪已歸

望溪集 九
號痛窮天、膈臆敗、摧計數、吾儕動屯行、蹇惟君怡、
愉履道坦坦、學同志同命、豈能懸老而羈死、理亦、
宜然、死者之恨、生者之憂、泯矣、終古欲訴、何由鳴、
呼哀哉尚饗

祭白侯文

余聞君訃往歲之秋時在塞垣心填百憂盡室北
徙遭迴在途沉疴疊嬰顧影心孤燕秦懸隔莫通
喪紀欲寄一言寸心難理公私薄遽以夕以晨昏
昏莫辨經涉冬春傳車祇役夜宿蘧廬君來見夢
執手脚躡告余將歸余不能止相持驚寤心怛不
已與君爲友歲逾星紀以古爲要善終如始君令
於桐余爲部人義相然信若弟與昆吏疵民瘼有
言不違行危語盡君亦余規余之在難君未得面

傳君踰年寢食惓惓孰云交契遂止於斯絕天隔地永無見期間君喪歸已閉埏門魂旣安宅來存故人君有悌弟子姓皆良成然首邱順彼大常我心之悲惟君則喻幽明殊路終古誰訴昧且聯辭晨告於野明水瓣香有淚如瀉

祭張母吳夫人文

嗚呼夫人之年七十有一又得良子以養生送死抑又何悲而余聞夫人之凶問不覺絜歛而嗚咽者蓋爲其子自超痛也今年春自超成進士或欲薦以館職自超曰某之舉於鄉也吾母愀然曰汝無所用此吾第欲汝得妾以子而常在吾側耳自超歸而從命焉而妾入室之夕夫人以卒嗚呼世俗之人願其子舉甲乙歷科第而死不恨者衆矣而天漫以畀自超有子以繼世匹夫匹婦之常也

而於自超難之自超終當有子而獨不得早歲月以傷其垂死之母之心嗚呼禹之仁孝也而痛之以羽淵周公之弟也而阨之以管蔡以至君臣夫婦朋友之間其賢者不必相遇而不賢者巧作之合以生惡故先兄有言乾坤之闢始於屯而終於未濟蓋天地之氣有盈竭數有純奇物生所值雖造物者亦不可如何也嗚呼爲父母而得見其子之成立者寡矣見其成立而子於兄弟夫婦子姓之間苟有恨焉則無物足以解其憂而致孝與敬適足爲親心之累故余不獨爲自超痛又以爲凡爲父母與爲子者痛也因書之以馳奠焉

望溪先生文

偶抄

家狀誌哀辭

受業王兆符程峯輯

大父馬溪府君墓誌銘

苞先世家桐城明季曾大父副使公以避寇亂之秣陵遂定居焉吾父出贅留滯棠邑凡十年苞生六年大父司訓於蕪湖吾父始歸秣陵舊居計此生惟大父承公事至秣陵苞應試皖桐道蕪湖得暫相依其時可稽日可數也江南土薄葬非其地水蟻必宅焉故高祖太僕公家桐城越十餘年而

望溪集
葬秣陵曾大父家秣陵越數十年而葬繁昌大父之終也吾父及叔父御柩歸桐城以大母權厝秣陵數十年而未得葬也及邁宗禍近支皆北徙諸弟倉卒葬大父及叔父母於所居之梁莊已十年而術者曰陰流入壙矣禍猶未已啓之信然復出而攢焉今

天子嗣位布大德赦吾宗還鄉里苞蒙

恩給假歸葬父母復奉大父柩自桐城來秣陵痛少時以家貧迫生計未得時依大父及冠後從錢

飲光杜于皇蒼畧諸先輩遊始知大父文學爲同時江介諸公所重大父官蕪湖兄舟實從凡七年每語余曰大父之仁也會王父未葬一飯不忘春秋時享及令節良辰未嘗不嗷唏終日嗚呼大父之葬未卜何期而苞自付則生世無幾時矣乃畧叙改葬之由以付兄子道希而待事焉大父處境順無由爲卓絕之行而官甚微士皆務科舉之學教之所及亦淺故不敢漫述惟自痛咎愆之積而已大父諱幟字漢樹號馬溪年十一入安慶府學

皇漢集 二
以歲貢生爲蕪湖縣學訓導遷興化縣學教諭告
歸卒於蕪湖時康熙丁卯七月也年七十有三大
母吳孺人早世葬江寧縣南周村穴甚狹不容合
葬子三人長伯父諱綏遠次吾父諱仲舒次叔父
諱珠鱗庶祖母王氏出也女七人皆適士族以某
年某月某日葬於某鄉某原銘曰
營之艱宅之寧以庇我後生

台拱岡墓碣

先考妣旣卜葬於台拱岡之七年不肖子苞始得
請假歸視窀穸雍正二年五月望前二日至自京
師郊宿越翼日丙辰展墓卜日得六月丁酉穿穴
視燥濕始反土而定封焉嗚呼昔我先妣姚孺人
早亡吾父更出贅時外祖官罷客死家貧內御者
一人老不任事吾母縫紵浣濯洒掃烹爨日不暇
給吾兄弟疾病啼號則吾父保抱攜持焉五歲課
章句稍長治經書古文吾父口授指畫焉其後自

棠邑遷金陵益窶艱已巳庚午間日食始能再而
弟林死苞與兄舟客燕齊歷歲移時不得一歸省
歸則計日以行至庚辰誓不更違二親遠遊而逾
年兄又死每當弟與兄忌日生辰及春秋伏臘令
節吾母先期意色慘沮背人掩涕過旬猶不能平
吾父則召親賓劇飲號呶以自混或遊郊野沉暝
然後歸自苞省人事未嘗見吾父母有一日之安
也吾父之歿也宅兆未營而不肖子以南山集牽
連赴

詔獄會宗禍有司奏宜族誅

聖祖仁皇帝哀矜並免罪隸旗伍而命苞給事

內廷戚友御吾母以北衰病纏連不肖子服公事
晨入夜歸又自首夏至杪秋必祇役塞上不得在
視起居寒燠吾母之歿也會返役得視含斂而喪
南還附漕船不獲躬扶柩至潞河以人事之常計
此生不得復見先人之塋墓矣故據戴記境外不
俟之禮使兄子道希道永奉大父母柩以戊戌二
月壬寅葬於南鄙石嘴之台拱岡如天之福

今皇帝嗣位推廣

先帝遺德

恩詔特原牽連入旗者赦歸鄉里吾祖宗塋墓有主而不肖子得視窀穸負土以終事且承

聖制謂以苞故而宥及全宗吾父母而有知也其戴

聖主無涯之德而爲不肖子悲喜當何如故敬告以妥靈且碣於原俾世世子孫知謹身寡過爲匹夫而常守塋墓之難也吾父生平宋潛虛旣論次

爲家傳吾母之喪故江寧太守長沙陳公鵬年適在京師預爲銘幽之文其言視不肖子苞爲可徵信於後世故弗更著焉先考字南董號逸巢生於明崇禎十一年十一月十六日寅時卒於

大清康熙四十六年十月初四日亥時先妣姓吳氏知同光二州同知紹興府事諱勉長女生於崇禎十五年正月十五日子時卒於康熙五十四年十二月初九日午時子三人女五人伯氏仲氏姚孺人出姚孺人從葬祖姑趙恭人墓側距今七十

今皇帝嗣位推廣

先帝遺德

恩詔特原牽連入旗者赦歸鄉里吾祖宗塋墓有主而不肖子得視窀穸負土以終事且承

聖制謂以苞故而宥及全宗吾父母而有知也其戴

聖主無涯之德而為不肖子悲喜當何如故敬告以妥靈且碣於原俾世世子孫知謹身寡過為匹夫而常守塋墓之難也吾父生平宋潛虛既論次

為家傳吾母之喪故江寧太守長沙陳公鵬年適在京師預為銘幽之文其言視不肖子苞為可徵信於後世故弗更著焉先考字南董號逸巢生於明崇禎十一年十一月十六日寅時卒於

大清康熙四十六年十月初四日亥時先妣姓吳氏知同光二州同知紹興府事諱勉長女生於崇禎十五年正月十五日子時卒於康熙五十四年十二月初九日午時子三人女五人伯氏仲氏姚孺人出姚孺人從葬祖姑趙恭人墓側距今七十

有五年矣不敢遷祔新阡懼魄體之動也七月朔
後五日男苞述

先母行畧

吾母姓吳氏先世莆田人後遷京師外祖諱勉爲
名諸生貢成均知同光二州同知紹興府事以直
節忤其地權貴人罷官流轉江淮間於吾宗老塗
山所見先君子詩因女焉吾母生而靜正誠意益
然終身無疾言遽色五六歲時外祖每日吾宗衰
此女乃不爲男兒遇經史中女事必爲講說及歸
先君子不及事姑或語及先王母輒哽咽欲淚前
母姚孺人遺女二次姊少桀傲母响濡久而悔悟

勉爲孝敬先君子中歲尤窮空母生苞兄弟及女
兄弟凡六人一婢老不任事縫紵浣濯洒掃炊汲
皆身執之方冬時僅敝絮一衾有覆而無薦旬月
中不再食者屢焉而先君子喜交游江介耆舊過
從無虛日必具肴蔬淹留竟日母嘗疽發於背猶
勉強供事十餘年無晷刻休暇而先君子性嚴毅
絲粟不治客退必詰責不少寬假母益篤謹無幾
微見於顏面及先君子將終惻然曰與若共事五
十年若於我毫髮無愧也母性孝慈而外祖父母

及舅氏皆客死繼而吾弟早夭兄及姊適馮氏者
復中道夭默默銜悲憂遂成心疾六十後患此幾
二十年每作晝夜語不休然皆幼所聞古嘉言懿
行及侍父母時事無涉鄙倍者臥疾逾年轉側痛
苦見者心惻而母恬然時微呻未嘗呼天及父母
旣彌留苞及小妹在側無戚容悲言恐傷不肖子
之心也生平未嘗一語詈僕婢而能使愛畏不敢
設欺誑卒之後內御者老幼悲啼過於子姓不可
曲止焉男苞泣血述

兄百川墓誌銘

兄諱舟字百川性倜儻好讀書而不樂爲章句文字之業八九歲誦左氏太史公書遇兵事輒集錄置袷衣中避人呼苞語以所由勝敗時吾父寓居棠邑留稼村兄暇則之大澤中召群兒布勒左右爲陣年十四侍王父于蕪湖踰歲歸曰吾鄉所學無所施用家貧二大人冬無絮衣當求爲邑諸生課蒙童以贍朝夕耳踰歲入邑庠遂以制舉之名名天下慕廬韓公見之嘆曰二百年無此也自以

時文設科用此名家者僅十數人皆舉甲乙科者以諸生之文而橫被六合自兄始一時名輩皆願從兄遊而兄遇之落落然江西梁質人宿松朱字緣以經世之學自負其議論證彙經史橫從穿貫聞者莫不屈服而兄常默默退而發其覆鮮不窒礙者苟謂兄盍譬曉之曰諸君子口談最賢非以憂天下也兄長余二歲兒時家無僕婢五六歲卽依兄卧起兄赴蕪湖之歲將行伏余背而流涕其後少長卽各奔走四方余歸兄常在外兄歸余常

在外計日月得與兄相依較之友朋之昵好者有不及焉兄常曰吾與汝得常家居俾二大人無離憂春秋佳日與二三同好步北山徘徊墟莽間候暝色而歸吾願足矣及庚辰四月余歸自京師七月兄歸自皖江而疾遂篤未得一試斯言也弟林先兄十歲卒兄欲於近郊平疇買小邱自爲生壙而葬弟於其側辛巳四月余爲弟卜地於泉井夢土人云伯夷今葬是余不忍廢兄之命遂以次年三月十六日遷弟柩與兄并葬其村之北原兄歿

聖澤集
十一
於康熙辛巳年十月二十一日年三十有七娶張氏子道希道永銘曰
不若于道者天絕之胡體其所受而至于斯矧材與志古固有不遂而又何悌

弟椒塗墓誌銘

吾弟旣歿且十年吾與兄奔走四方尙不能爲得一邱之土而兄亦以憂勞致疾卒於辛巳之冬踰年春始卜葬於泉井之西原而以弟祔焉自乙卯以前吾父寓居棠村弟始孩依母及羣姊而余依兄戊午後兄侍王父于蕪湖而弟復依余自遷金陵弟與兄并女兄弟數人皆瘡痛數歲不瘳而貧無衣有壞木委西階下每冬月候曦光過檐下輒大喜相呼列坐木上漸移就暄至東墻下日西夕

牽連入室意常慘然兄赴蕪湖之後家益困旬月中屢不再食或得果餌弟託言不嗜必使余啖之時家無僮僕特室在竹園西偏遠於內余與弟讀書其中每薄暮風聲肅然則顧影自恐按時弟必來視余或弟坐此余治他事間忘之矣弟性警敏鷄鳴入市購米薪日中治家事客至佐吾母供酒漿日入誦書夜參半不寐體素羸吾與兄數戒之不得竊恨焉果用此致疾方弟之存家雖貧父母起居寢食毫髮以上弟皆在視得其節弟歿吾與

兄勤志之輒復遺忘吾父喜交遊與諸公夜飲或漏盡乃歸旬月中間者僅三數日耳弟恒令家人就寢而已獨候門及余繼之則困不支矣弟疾起於丁卯之冬時余與兄避難吳中弟偕行咯血隱而不言血氣遂大耗其卒也以齒牙之疾蓋體羸不能服藥也先卒之數日余心氣悸動父命避居野寺弟彌留及夢中呼余不已嗚呼昔之人常致死以勤禮余未有大疾而廢焉悔與痛有終極耶弟初名棠君後更名林字椒塗卒於康熙庚午三

月初四日年二十有一銘曰

天之於吾弟吾兄酷矣使弟與兄死而余獨生於
余更酷矣死而無知則已其有知弟與兄痛余之
無依母視余之自痛而更酷耶

沈氏姑生壙銘

姑次居六繼室於沈氏嫁愆期年二十有六矣夫
故失愛於父常孤行遠遊姑年三十有一而夫死
無何舅亦死羣叔離異獨挈幼女及前娣之子以
居子將冠又死而女贅陶氏子良遂依焉先君子
於諸姑貧者月有餼而姑未嘗言貧被服必潔以
完苞客遊家居日稀曾不知姑之艱也姑老矣偶
袒內襦補綴無間咫搨者因泣然曰此未足言也
吾始寡沈氏以爲贅疣居荒園日夕擷野蔬聚落

葉而炊之每陰雨則持二孤以泣時汝祖老汝父
 貧多累故不敢告以重父兄憂至於今於吾為寬
 矣、苞自倦遊歸喪葬婚嫁無虛歲又女兄弟五人
 皆貧不能自存雖知姑之艱未暇為謀常私自付
 以為生、養、死、藏、吾、終、當、任、之、而、今、無、望、矣、苞、難、後
 姑見家人必號痛今年春以書來曰吾居世幾何
 將吹去聲窶於夫之兆姪銘之及吾之見也先君子女兄
 弟凡十人今其存者惟姑與小姑耳姑年七十餘
 苞淹恤無期而今乃誌姑之生壙尚何以舉其辭

耶姑之夫諱某武舉人其卒也距今康熙己亥四
 十有一年墓在江寧縣某鄉某原銘曰
 發終世婦事畢百歲之後歸其室

鮑氏姊哀辭

鮑氏姊幼名且前母姚孺人出也吾母繼室姊七歲苞之生姊年十有二矣時吾父寓崇村家無僕婢獨以苞屬姊絕乳食必啼姊抱持且行且食之食竟乃止遂以爲常姊夫鮑氏庶長也君母嚴姊敬事焉因以庇所生之姑有姒恣睢負嫡勢相陵兩家僕婢嘖嘖姊於弟妹未嘗一語及之父母有問則稱嫡姑均愛姊歸三歲喪夫逾年一子殤撫姒所生女久之又撫其子皆深愛如已出旣老相

視泛泛姊嚙然也。一日、歷而不能興、苞赴
詔獄、姊適送女越境、無由語訣、又十有四年、蒙
聖恩許假歸葬、而姊卧疾已經年矣、每見苞則嗚
咽不可止、用此過旬、乃敢一往視、比北上登程、五
旬有五日、而姊卒。時雍正三年三月二十九日也。
苞性劣而遇屯於父母兄弟、尠不遺恨者、而未若
姊之深苦、不能悉生、不能依疾、不能養、又無子女、
以寄其愛、嗚呼、苞其若此、心何哉、姊夫卒、以瘞、旣
葬、仲復羸疾、其家用俗忌發而焚焉、未知兆安在、
聞姊喪、命兄子道希相視、諏度、然後以姊耐歲、將
除、問未至、無以攄吾哀、乃涕泣而爲楚言、其辭曰、
幼而苦辛、乃義之服、些天命早寡、亦未云酷、些崎
嶇、隱憫、遭是則獨些、旣息以死、猶淹衾褥、些胡爲
大年、俾饜此毒些、

鮑氏妹哀辭

雍正六年秋八月朔後三日始聞鮑氏妹之喪距其卒百二十有七日矣兄子道希懼余盛夏病不勝哀故緩告妹爲先君第四女渾厚靜默於先母爲近幼共饑寒諸姊嫁後佐母治家事歸鮑氏子季昭其伯兄孟虎卽伯姊夫也早夭無後家以漸落仲尙能少蓄藏及季受室則掃地無遺與仲分日供二親及巨嫂食姑夙愛仲婦及晚歲每語人曰季婦良苦值主饋吾食飲常得節適伯姊之終

困牀席累歲妹侍尤勤嗚呼自吾弟吾兄早世女
兄弟五人各窶艱惟馮氏姊及妹有子而馮氏姊
中道亡伯姊次之今妹又次之其存者謝氏妹羸
疾經年弗瘳仲姊歸曾氏者蹙而弱足顧念死者
生者尙安用久留此衰疾羈孤之身於人世耶余
竟世爲羈屬有天幸父母兄弟及馮氏姊之喪皆
會余歸期得親合斂惟伯姊及妹過時然後聞抑
自伯姊以前每有凶咎無在側與否必先見其魄
兆而妹獨無豈余混混塵事中不復能自存其清
明之氣耶抑心之精爽至是而消亡耶乃爲文以
攄余哀俾道希薦告於殯宮其辭曰

嗟予同氣性和壹兮命則坎屯鮮安吉兮汝雖貧
約家室寧兮惟是戚屬涕淚盈兮二昆瘡札兩姊
燿兮存者三人疾阨兼兮鄉予在難慘未別兮老
母北轅痛永訣兮昔歲生還相慰撫兮送我階庭
遂終古兮生叢百憂如滕繼兮死果無知解此縣
結兮

嫂張氏墓誌銘

嫂姓張氏江寧人年二十歸吾兄先君喜交游四方者舊及里中執友相過日數輩自嫂歸兄督就中饋老母始少得休息余受室妻蔡氏從嫂供事多不逮用此志不相得及蔡氏亡二女依嫂以居少者痘先母語余女症危氣息觸人不可耐世母保抱攜持意色不厭亦人情所難也自先君歿冢婦持家余以老母盥饋及家事數責讓嫂常含怒及余邁難盡室北遷幼女復依嫂以居撫之不異

於所生吁。此雖嫂之明。抑吾母淳德。及吾兄身教。之所漸漬也。余兄弟三人。弟林未娶而夭。余與兄奔走衣食。生常違離。兄將終。遺命三人必同邱。婦皆別葬。康熙壬午。兄及弟卜宅泉井之西原。近二十年。以陰流積壙。起厝復數年。而地不可得。雍正六年正月。余在京師。兄子道希。訃母喪。且請誌以文律。按之。婦從夫。宜附誌。而兄有成命。嫂當別葬。則特誌無妨也。兄既有前誌。而嫂葬無期。余衰羸。恐不逮事。乃預爲誌。以慰道希兄弟之思。嫂年六

十卒。以雍正五年十二月十二日子。二長道希次道永女一適喬氏。子嫂素無疾。邇歲諸孫盡殤。又爲姻家所累。家益落隱憂。自懟馴至大疾。嗚呼。是重可哀也。銘曰
從夫教義克明。有子而良。終延世以蕃昌。

亡妻蔡氏哀辭

妻蔡氏名琬字德孚江寧隆都鎮人以康熙丙戌
秋七月朔後二日卒在余室凡十有六年自巳卯
以前余客京師河北淮南歸休於家久者乃三數
月耳自庚辰至今赴公車者三侍先兄疾踰年持
喪踰年而吾父自春徂秋必出居特室余嘗從焉
又間爲近地之遊其入居私寢久者乃旬月耳余
家貧多事吾父時拂鬱旦晝嗟吁吾母疲疴間作
吾與妻必異衾裯竟夕無言妻常從容語余曰自

吾歸於君吾兩人生辰及伏臘令節春秋佳日君常在外其相聚必以事故不得入室或蒿目相對無歡然握手一笑而爲樂者豈吾與君之結歡至淺耶余先世家皖桐世宦遠自遷江寧業盡落賓祭而外累月踰時家人無肉食者蔬食或不充至今年余會試注籍春官歸踰月而妻卒妻性木強然稍知大義先兄之疾也鷄初鳴余起治藥物妻欲代余不可必相佐又止之則輾轉達曙數月如一日也壬午夏吾母肝疾驟劇正晝煩曠不可過

命妻誦稗官小說以遣之時妻方娠徃徃氣促不能任其詞余戒以少休妻曰苟可移大人之意吾敢惜力耶余性鈍直而妻亦戇生之日未嘗以爲賢也旣其歿觸事感物然後知其艱余少讀中庸見聖人反求者四而妻不與焉謂其義無貴於過暱也乃余竟以執義之過而致悔焉甚矣治性與情之難也蔡氏在江寧爲儒家妻生男二人皆早殤女二人其卒也產未彌月蓋自懟以致疾也年三十有七于是流涕爲辭以哀之曰

惟。在。生。而。常。捐。乃。既。死。而。彌。憐。羗。靈。魂。其。有。知。併。
悲。喜。於。余。言。

兄子道希墓誌銘

道希吾兄百川長子也性淳一兒時果珍在前不
予不求索多病苦藥物予視之則斂容而飲大父
母愛之每以忘其憂年十七入縣學課試必高等
以家禍遂棄舉業力持門戶余初被逮偕縣令蘓
君以

特召白吾母及邀寬法老母北上終不知余之在
難、以、道、希、能、巧、變、以、安、大、母、也、時、弟、妹、皆、幼、內、憂
外、患、獨、身、當、之、遂、得、危、疾、連、年、累、歲、吾、母、卒、後、入

省余者再疾皆動每切戒毋更至及終母喪迫欲
依余余發家書必申前諭乾隆元年

詔舉孝廉方正四年冬旅見

上有褒語命仍應制科會弟道永通判京兆僕隸
設詐得財事發朋謀誣污主人以自脫道希氣噎
及聞其弟受刑自日未中以至於昏大慟遂沉篤
厥後大小司寇親訊半得昭雪而道希疾不可振
矣自先兄與余依古禮經定齋期喪次余雖在外
遇期功道希必率諸弟出次始成童喪余妻啼號

如失怙恃大母及余設辭多方不能曲解也余子
女五人愛道希或過於同生其卒也年五十有四
在余側不異爲孺子時余視之亦如孺子平生無
一言一動使余心隱然不適者茲來盡室以行蓋
將送余之終而余乃視其棺斂其妻子又以道永
之禍窘急遄歸余惡能無恨哉然於道希繾綣依
余之心則可以無恨矣道希卒於乾隆六年正月
十八日妻岳氏工部主事岳康女有賢行生子仁
聰明和順十歲而殤女二人繼室以其妹無子以

道永之長子惟敬嗣

年某月某日葬於

鄉原銘曰

雖離愍同愍以終世實無忝於所生我憑當心兩弟在旁安歸泉塗汝母惻傷

兄子道希婦岳氏墓誌銘

雍正九年九月望後二日日既夕余歸自海淀渴且饑會兄子道希婦岳氏訃至家人進糜粥甫入口氣上逆而止夜不能寐蓋悲余在難顛危困迫惟道希首當之而婦實共之又念道希貞疾垂老既喪其良子而又亡其妻益無以安其身也岳氏來婦先兄之歿久矣事余極恭順而事姑之禮或未詳余時督教及余難後越十有三年得假歸葬則姑姊妹翕然稱冢婦之良岳氏有子曰仁生十

年而殤其生及殤余皆未之見也而聞其聰明淳篤秀出於衆其天也家人咸爲感傷而忍心者或用以相詬誶冢婦常示之以默衆尤以爲難余自有知識見族姻里閭以及四方所傳聞凡婦人之邪惡而作慝於夫家者動數十年無止息甚者名辱家毀而其身乃康強而考終其賢者非貧病無子則不得於夫其當於夫必早寡或中道而隕其生嗚呼咄哉余生世幾何自先祖暨先兄亡弟皆以陰流入壙出而攢已逾十年若亡妻若兄孫仁

若、嫂、氏、先、後、權、厝、近、郊、者、纍、纍、焉、岳、氏、之、葬、未、卜、其、何、年、也、憫、其、賢、而、無、子、又、不、得、與、夫、偕、老、故、豫、爲、誌、銘、以、畀、道、希、且、以、紆、其、哀、岳、氏、四、川、涪、州、人、工、部、主、事、康、之、女、卒、於、八、月、望、前、一、日、年、四、十、有、六、女、二、人、銘、曰、生、無、逆、於、倫、死、有、思、於、人、亦、何、恨、乎、無、身、

兄孫仁壙銘

兄子道希有子曰仁余北徙後始生於金陵昏昏
塵事中未暇詰其性質何等也雍正元年吾宗邀
恩赦除旗籍秋八月將遣妻子南歸祭告於考妣
既餽餘南書至則仁死矣余感而疾逾月弗瘳蓋
先兄之子二而在孫惟仁曾祖副使公以後之宗
子也其父之書曰兒弱植自四五歲得氣疾旬月
必作痛苦不可忍少間則不待督課而盡志於書
生十年通四書毛詩每叩疑義輒困其師夕返內

舍數舉經說以開姑姊妹死之日自恨曰仁不孝之子也自今吾父母大母弗得寧矣嗚呼仁之生適當吾宗禍氣之興其父母震動播越則受氣之不完固其理也然造物者既不欲假以生而特賦以清明醇懿之性質何爲其然哉仁生於康熙五十三年三月以雍正元年八月殤葬於江寧南門外銘曰
家禍寧爾命傾繫神者之不弔而昇以毒余之中情

高善登妻方氏墓誌銘

四川夔州府學增廣生梁山高善登妻方氏工部主事諱登嶧之女己丑進士世濟之妹也於余爲妹之無移服而未遠者工部居近吾家世濟童稚視余如嚴師至其家必從問經書古文妹常在旁高氏故華族流寓金陵甚貧妹歸不逮舅姑能忠養祖姑兼奉尊嫜之嫠自工部父子以家禍謫戍黑龍江族衆北徙善登餬口四方妹獨持門戶忍饑寒課子吾宗在金陵者或窶艱自顧不暇或不

相往來惟歲時一返余家視道希兄弟如近親喜
憂必告時通有無然逾時閱歲必歸之以爲信不
可曲止其後年餘絕無假貸道希兄弟時候問門
者每以他出辭入視戶果外鍵雍正己酉秋疾旣
亟道希始聞奔視卧蒯席別無覆薦惟少子在側
急購衾茵進藥物越二日而卒老婢曰年來以假
貸不能歸衣敝履穿戒姪輩至卽鍵戶堅辭曰無
爲使忡忡也時長子允從父歸西川應鄉試道希
道永道章親含斂以書來告嗚呼先王制禮小功
皆在他邦加一等其此故也夫余與道希兄弟悔
痛不可追矣然其性行之艱貞不可使終泯也故
質言之俾異日以奠於幽宮妹諱敷年五十有一
子二人允乾隆元年恩科舉人暉縣庠生銘曰
假而非女士遭變砥節志事當如何吁悒乎隱愍
而莫之恤惟生者之瘥

鮑氏女球壙銘

康熙庚寅夏五月余妹適鮑氏者卧疾甚憊而余有故鄉之行往視之其長女球侍戒以在視食飲寢興之節球淚應聲落踰月余在皖家僕至叩之則妹疾少蘇而球遘癘疾死矣金陵俗浮惰而女教尤不修甘食美服嬉遊而外爲女爲婦之道胥無聞焉其富女以此相高貧者不得則以懟其父母賤其夫而外其舅姑余每侍老母側見內外宗女爲陳古女婦儀法羣女徃徃心病余言稍稍自

引去獨球承聽久而益恭鮑氏故富饒至球父甚
寡又多子女而家無僕婢球自十歲卽佐其母汲
爨縫紉浣濯攜持弟妹凡成人之艱辛實備嘗焉
而自有生以至於歿其饗殮未嘗一節適也被服
未嘗一完善也故余與其父母用此尤不能爲懷
然世之福祥壽考而缺於人道以愧負其所受於
天者多矣而球無愧也然則余與其父母亦可以
無恨也球以康熙庚寅七月二十三日殤年十有
六未字葬於某鄉某原銘曰

而、已、反、其、初、生、人、之、患、而、今、其、免、夫、而、母、疾、其、蘇、
而、安、而、居、

望溪先生文 偶抄
而曰及其所坐之人思而令其學天而毋其其德

望溪先生文

偶抄

騷賦表啟銘題

受業王兆符程崧輯

七思

兄百川先生

憶生小兮棠之鄙兄束髮兮余毀齒招羣兒兮布
行陣據岡陵兮畫營壘比受書兮心開莘野傅巖
兮神徃來聞四鄉兮捐瘠憂旱蝗兮忘寢食既移
家兮台門兄侍祖兮蕪江墳念二親兮背膺_{音判}牋語
含悽兮夜達旦既浹歲兮來歸歎愚迷兮不自知

望溪集
親長艱兮子職失顧外此兮安所恤勤俗學兮召
生徒益無儲兮桁無襦各掉臂兮分馳心搖搖兮
天一涯咨祁寒兮暑雨溫清常違兮後難補誓飲
水兮啜菽依庭帷兮勿再出兄返棹兮秋清喜相
持兮心暗驚上高堂兮強笑語疾已纏身兮瘵心
腑困藥石兮經年智氣清明兮命不延謂正終兮
毋黷將絀纒兮猶齊邀誘二老兮安眠喻妻兒兮
勿前瞑移時兮忽張日申余戒兮情尤蹙嗟童稚
兮相隨動止因依兮不暫離視燠寒兮戒走趨恩

勤如母兮義兼師長飢驅兮僕僕痛乖分兮苦相
勗存夜氣兮懼枯亡警畏途兮虞莽伏恨余頑兮
弗醒終擿值兮冥行疎周防兮罹罪罟憂病母兮
離鄉土負親恩兮悖兄訓撫寸心兮難自問永思
騫兮百感集腸繚轉兮嗟何及

弟椒塗

兄始赴兮鳩茲余心孤兮類狂癡母挈弟兮畀余
寢食相依兮漸坦夷弟垂髫兮能內事左右無方
兮達親意吾翁夜遊兮星斗闌弟唵誦兮待更殘

迓親賓兮拂几席、竈下煎和兮助母力、嗟余繼兄
兮數行遊、弟居守兮憺無憂、歲已巳兮秋雲黹宵
濟澄江兮幽夢感荆榛、四塞兮塗冥冥、連山赤黑
兮延火烝余呼、弟兮母前行、弟赴火兮如絃驚、叫
天觸地兮悲填膺、忽寐覺兮心怛怛、竭來歸兮歲
將畢、弟果邁兮齒牙疾、厲熏心兮苦自匿、懼骨月
兮憂思逼、涉季春兮月生魄、命遐終兮厄鬼伯、哀
吾生兮負人紀、恨於弟兮無倫比、饑缺食兮寒思
綿、縈苦辛兮夜不眠、惜寸晷兮繹經書、每發問兮

心開余余卞急兮多馮怒、弟愉婉兮徐相喻、謂行
修兮德可成、嗟中道兮隔幽明、當沉疴兮正暝眩
余懷憂兮體忽變、重愛身兮輕失義、旣彌留兮忍
相避。弟卒前六日余外腎忽蹙入痛入天兮悔
莫釋死自罰兮終何益。余庚戌立秋前二日疾
病作遺令斂時袒右臂

伯姊

余鬢角兮未生齒、持負噓呵兮屬伯姊、姊年先兮
一紀動、息無違兮宮事理、幼學步兮奔騰重強負
兮危能升姊、俄瞬兮心經食為吐、兮櫛為停、逮纁

神兮辭姆承兩姑兮心獨苦介恃嫡兮競橫冢婦

搗謙兮不敢並時歸寧兮母有問稱姑慈兮奴無

愠年過二十兮即為嫠侍食重闈兮遠事苦抑悲

姑旋亡兮子并天昏夢悲啼兮寤辟標中歲長齋

兮祝嫡姑宵旦依依兮卧起扶幸有妹兮四妹亦歸鮑季

子為宛若謂餘生兮將有託夫之弟子兮弟之女

嗣為婚媼兮力機杼門內團樂兮聚親屬菽水能

供兮得安處大命至今天時懟晝立清庭兮忽顛

躓枕席吟嘯兮累年歲初言讜兮同唐既魂悸嗟余告

歸兮姊在牀語不辨兮淚盈眶每一見兮增悲瘳
不經旬兮不敢視迫公程兮作死別及半途兮姊
萎絕痛在世兮常生離永負心兮更何說

仲姊

姊墮地兮前母亡母鞠育兮懷閔傷恩雖勤兮教

未執女事煩勞兮多不習既有家兮不相中賴姑

慈兮尚無闕中歲姑亡兮家益落竟世飢寒兮常

嗃嗃姊夫既耄兮病沉堙五易春秋兮伏枕茵竭

蹙宵晨兮併百憂年過七十兮影無儔天難呼兮

皇漢集
惟自愍力、敝心、灰兮、命亦盡、嗟姊疲、痿兮、復踰年、
地濶天長兮、心目懸念先妣兮、歿賫志、惟姊存兮、
愛可寄、伯姊殂兮、姊繼之、痛骨脈兮、更無遺、有女、
新嫠兮、生事室、吾身後兮、宜勤恤、

三姊

昔吾父兮、不憂貧、拚掃炊烹兮、母實親、兩姊出嫁、
兮、家無人、姊孩稚兮、備艱辛、弟妹啼號兮、強飭力、
夜、倒衣兮、晝忘食、剝啄聲喧兮、庭有客、趣殺蔬兮、
理盤榻、嗟余兄弟兮、常危疾、姊在視兮、時銜恤、勤

藥物兮、顛神靈、每竟夕兮、燈熒熒、年逾二紀兮、復
愆期、入贅、碁周兮、始授綏、姊夫歲出兮、守閨、翳養、
公姥兮、尤勤、劬米薪、強半兮、母家、索潔饋食兮、甘、
糠、覈苦、遭長叔兮、性儼、僂養、不顧兮、偏工、讒稚子、
寒衣兮、不蔽、膝謂兄嫂兮、餘私、積朝、進食兮、暮加、
衣、姑含怒兮、滋乖、違膈、噎經年兮、隱自、悲命、在須、
臾兮、畏母、知弟、早燿兮、兄繼、萎余、天涯兮、身係、羈、
念、姊仁、恩兮、常惻、惻心、欲報兮、無終、極余、盛夏兮、
始來、歸姊、初秋兮、與世、辭志、長賫兮、更誰、訴情、寃

見兮惟泉路

妻蔡氏

之子歸予兮歲將暮獻歲燕南兮就知故吾父吾
兄兮書問傳定省温恭兮介婦賢暑霑襦兮寒粟
膚隨冢婦兮饋中廚日月相疎兮歸路遠十載崎
嶇兮轡三返誓言息足兮守故邱兄攫危疾兮母
沉憂予茫洋兮若無歸妻左右兮事無違晝娛姑
兮誦古記夜助我兮斂荆燧時方娠兮苦無力氣
弱心孤兮強自飭哀吾生兮長卒卒逐公車兮復

再出丙戌首夏兮經邗溝生徒請業兮爲淹留願
假園林兮奉老親四序皆宜兮景物新歸告高堂
兮欣有託入室申言兮理行橐秋期近兮一葦杭
自今與女兮同安樂謇將言兮容忽覩吾與君兮
結懽淺別常淹久兮見常稀會當行兮事或舛嗟
斯言兮竟成識閱月身亡兮若弦翦二親含慙兮
顏不開稚女求哺兮淚常泫踰歲旻天兮降鞠凶
吾父康強兮命亦終衰麻釋兮刑禍延關木索兮
復連年寬刑書兮編禁伍母依子兮來江滸望關

望溪集
河兮阻深衰疾熒熒兮遡風雨念吾妻兮若未死
寢食扶將兮尚可倚妻早逝兮免憂煎獨予身兮
積疾愆

兄子道希

春陽兮載歆白日兮昭昭而杳杳兮卽長夜患吾
心兮若焦而出腹兮呱呱吾二親兮色愉比齒生
兮含糝音汝餅餌類盡室歡忻兮相告語時風咳兮寒痛音實春時首疾也嗟余
弟兮重煩勞安汝眠兮畏汝驚保抱終宵兮圈豚
行歎門祚兮衰殘失所怙兮常樂樂及受室兮歲

三遷祖重承兮泣血漣旣脫衰兮余邁難宗禍延
兮天屬散內機辟兮外置孥狐晝鳴兮鬼夜闕顧
四海兮一身多母妻呻吟兮弟妹哦望何門兮投
止竄窮山兮伏戎起陰霾靖兮皇穹開精已銷亡
兮憂未弭愛子溘兮朝露痛春暉兮不再駐恃孝
婦兮同心思子隨姑兮卽長暮挈家累兮依所親
冀桑榆兮志少伸駭驚風兮折雁翮氣噎塞兮橫
胸臆兄心摧兮弟叢棘弟未死兮兄幽隔而父而
母兮兆南岡妻對埏兮子在旁魂營營兮識路望

望溪集
江天兮隱雲樹。

先君子同產八人乾隆三年姑適曾氏者歿惟
叔父小姑尚存叔母早世叔父感傷欲倣楚辭
作七思含意聯辭輒氣結而中止今年正月兄
卒於京邸叔父哭之慟兼旬夜不能寐始爲兄
成一章浹月中次第屬草命永編錄問序次之
義曰男女異長諸姑出室不可以齒序也叔母
亞諸姑何也曰不以服之重輕先天屬也置季
姑適鮑氏者何也曰有子年近六十處境順哀

辭已前具矣大父大母無述焉何也曰自古無
子別父母之詩陟岵作於中途但言父母思已
而不言已思父母唐人作觀別者不自言離其
親不忍言也親亡而自痛自責則義盡於蓼莪
矣騷之義隱深其辭恂恍而彬蔚茲則易之以
直樸何也曰至親不文修辭之體要則然乾隆
六年四月望前二日道永識

熊偕呂遺文序

余客游四方與當世士大夫往還日久始知歐陽公所云勤一世以盡心於文字者於世毫無損益而不足爲有無。洵足悲也。故中歲以後常陰求行身不苟而有濟於實用者。雍正元年川陝總督年羹堯入覲所至院司提鎮皆過禮以崇敬一時爭傳山西壽陽令供具一守驛站故常傳呼紛至則獨身前往羹堯亦異之問其姓名則江西安義熊應璜偕呂也是年始以進士出試用到官卽象八

皇溪集
卦區境內爲九宮各計廣輪擇走集支湊之地設
社倉一義學一中央倍之凶荒賦粟不遠其居少
長相師以親以睦區中聯伍相保相糾盜賊奇衰
之民居無所容竄無所匿期月政行鄉郊無犬吠
之警嗚呼此周官比閭族黨州鄉之法朱子所謂
合學校教養德行道藝選舉爵祿宿衛征伐師旅
田獵而共爲一事者此法行則人人安其居宿其
業守其分承其事而天下平矣乃君踰年而卒於
官余難後先祖及亡兄弟再卜葬再以陰流入壙

起厝乾隆七年告歸余生全熙癸至自江西爲余求兆
域八年秋又因吾友魏方伯慎齋而得熊秀才又
昌叩之則壽陽君之子也因是具悉君之生平其
進退取與必以古義自繩久困公車房師某畀數
百金使由捷徑君固辭不受及當官則爲前令任
宿負以毀其家其家居倡復廬溪堰潤三十餘里
垂五十年不困於旱潦噫行身不苟而才濟於實
用君其庶幾乎惜乎吾與生同時而不得一見其
人罄其胸中所蘊蓄也又昌倜儻有父風爲余涉

三、江、彭、蠡、之、險、往、反、四、千、餘、里、連、歲、再、至、而、後、有、
成、事、將、歸、出、君、制、義、請、序、發、而、視、之、其、源、出、於、其、
鄉、先、生、陳、章、諸、公、而、小、變、其、格、調、蓋、君、久、於、場、屋、
不、得、不、參、用、歐、公、所、謂、順、時、者、而、性、質、之、耿、介、智、
識、之、閎、深、時、躍、露、於、辭、氣、之、外、則、其、積、於、中、者、不、
可、掩、也、然、以、君、之、篤、志、經、史、古、文、皆、未、克、成、書、而、
所、存、惟、制、藝、以、君、高、望、遠、志、於、周、官、之、治、教、而、不、
獲、成、政、於、一、邑、之、間、序、其、文、未、嘗、不、掩、卷、而、三、歎、
也、

李穆堂文集序

余。與。穆。堂。始。相。見。卽。相。與。議。所。處。康。熙。庚。寅。抄。冬。
穆。堂。以。庶。吉。士。覲。省。歸。里。道。長。干。停。船。過。余。余。時。
以。老。母。衰。病。不。敢。遠。行。而。守。土。吏。及。族。姍。皆。謂。誤。
殿。試。期。至。再。三。懼。物。議。穆。堂。獨。正。議。以。排。之。余。因。
謂。穆。堂。子。必。大。爲。世。用。不。及。今。肆。力。於。學。則。無。其。
時。矣。逾。年。而。余。以。南。山。集。牽。連。兼。罹。宗。禍。荷。
先。帝。赦。除。召。入。

內廷編校而穆堂宦益達各以職事拘綴惟一見

於故相國安溪李公所及

先帝登遐穆堂自北河入臨朝夕聚喪次始知其學益老識益堅氣益厲而可任公卿之位無何果起家爲吏部侍郎巡漕運開府粵西總督直隸不通問者復四三年其後穆堂亦掛吏議荷

聖上赦除典司別館編校暇日過從出其已刻散體文示余則已數十萬言矣又踰年總其前後所作別爲三集各五十卷而屬序其正集其考辨之文貫穿經史而能決前人之所疑章奏之文則鑿

然有當於實用記序書傳狀誌表誄因事設辭必有槩於義理使覽者有所感興而考鏡焉其平生所志及已見於設施者卽是編以求之抑可以得其崖畧矣穆堂自始進卽得顯仕出入中外近二十年任重而事殷其於誦數講習宜未暇遑而竟能以文章振發於世豈非其材有兼人者與余終世未嘗一日離文墨而智淺力分其於諸經雖粗見其樊未有若古人之言而無棄者而文章之境亦心知而力弗能踐焉觀穆堂所編未嘗不躊躇

皇海集
滿志而又以自疚也。

余東木時文序

乾隆八年冬十月余生^全歿以余先兆未卜復至自

宜黃出其尊人東木先生時文請序余正告之曰
子之尊人與余共事書館無間晨夕後雖各有典
司而旬月中未有不冉三見者其所志所學所爲
詩古文無不與余商論而未嘗及于時文今錢版
行世有年而有是請殆子之意非尊人之命也余
自序宜興儲禮執之文爲其本師所點竄以序爲
戒者已數十年雖相知如慕廬韓公蓮山廖公不

能強而今爲此則義有虧且余雖立戒而恃游好
自爲序而標余名及不知誰何之人詒託以誑書
賈者數數然矣而未嘗一爲別白以吾之戒素明
也而今爲此毋乃使人疑夫詒託者之皆真乎
作而言曰吾父獲交久長而不敢請以先生之戒
明也而私嘗命戾曰汝能使先生序吾文則孝莫
大焉吾非欲以時文爭名於時也先生老矣吾所
祈嚮與所以交於先生不可使沒於後世耳願先
生卽取茲所以命戾者而筆之書則不惟可明戒
于前且可以辨僞於後矣戾之請也有辭而持之
有故乃發其父之文而觀之蓋久困於舉場故擇
義遣辭不敢過爲艱深怪特而中所蘊涵則非順
時取譽者所能貌似此好古積學之自然而流露
者也西江士友並稱安義熊偕呂之文其子及衍
亦以序請而未以其文來會余感戾言歷爲戒之
巔末使報其尊人故并及之



